

LIGJI NR. 08/L-274

PËR SHËRBIMET PRIVATE TË SIGURISË

Kuvendi i Republikës së Kosovës,

Në mbështetje të nenit 65 (1) të Kushtetutës së Republikës së Kosovës,

Miraton:

LIGJ PËR SHËRBIMET PRIVATE TË SIGURISË

**KAPITULLI I
DISPOZITAT E PËRGJITHSHME**

**Neni 1
Qëllimi**

Ky ligj ka për qëllim të rregullojë kushtet, procedurat, aktivitetet dhe veprimtarinë e personave fizikë dhe juridikë që ofrojnë shërbime dhe aktivitete në fushën private të sigurisë.

**Neni 2
Fushëveprimi**

1. Dispozitat e këtij ligji janë të obligueshme për organet relevante në fushën e shërbimeve private të sigurisë, si dhe për personat e tjerë fizikë dhe juridikë, veprimtaria e të cilëve ndërlidhet me shërbimet private të sigurisë.
2. Kushtet e punës për punëtorët e sigurimit, rregullohen me legjisllacionin e zbatueshëm të punës.

**Neni 3
Përkufizimet**

1. Shprehjet, termat dhe shkurtesat e përdorura në këtë ligj kanë këtë kuptim:

1.1. **Aplikues** - nënkupton personin juridik të regjistruar si shoqëri tregtare që aplikon për leje, njoftim për fillimin e veprimtarisë, kartelë zyrtare identifikimi, certifikim ose ricertifikim nga organi kompetent;

1.2. **Certifikim** - nënkupton pajisjen e personit fizik me certifikatë për secilin lloj të shërbimit të sigurimit privat, pas dhënies së provimit shtetëror përkatës të organizuar nga organi kompetent;

1.3. **Hapësirë e siguruar** - nënkupton hapësirën në të cilën kryhen shërbimet e sigurimit nga ata që posedojnë leje sipas këtij ligji;

1.4. **Instruktor për shërbimet private të sigurisë** - nënkupton personin fizik, i cili është certifikuar dhe është autorizuar nga organi kompetent për trajnim të caktuar të kandidatëve në fushën private të sigurisë;

1.5. **Institucion trajnues në fushën private të sigurisë** - nënkupton personin juridik që i është dhënë leja nga organi kompetent për ofrimin e trajnimeve në fushën private të sigurisë;

1.6. **Kartelë e identifikimit** - nënkupton dokumentin me të cilin punëtori i sigurimit identifikohet si i autorizuar për të kryer detyrat e parapara me këtë ligj;

1.7. **Klient** - nënkupton personin fizik dhe/apo personin juridik, i cili hyn në marrëdhënie kontraktuale me kompaninë private të sigurimit;

1.8. **Kompani private e sigurimit** - nënkupton personin juridik që posedon leje nga organi kompetent për të ofruar shërbime private të sigurimit në pajtim me këtë ligj;

1.9. **Kontrollim me prekje** - nënkupton kontrollimin me prekje të personit që e kryen punëtori i sigurimit për sende të kundërligjshme apo të rrezikshme;

1.10. **Leje** - nënkupton pajisjen me leje të personit juridik për ofrimin e shërbimeve private të sigurisë në fusha të caktuara të sigurisë, ashtu siç specifikohet me këtë ligj;

1.11. **Mbajtës i qenit** - nënkupton punëtorin e specializuar të sigurimit, i cili është i autorizuar me kartelë të identifikimit që të kryejë detyrat sipas këtij ligji të lidhura me përdorimin e qenit;

1.12. **Menaxher i sigurimit** - nënkupton punëtorin e specializuar të sigurimit, i autorizuar nga organi kompetent me kartelë të identifikimit, i cili është përgjegjës për udhëheqjen e shërbimit përkatës të sigurimit dhe menaxhimin e punëtorëve të sigurimit, sipas këtij ligji;

1.13. **Ministria** - nënkupton Ministrinë përgjegjëse për Punë të Brendshme;

1.14. **Ministri** - nënkupton Ministrin e Ministrisë përgjegjëse për Punë të Brendshme;

1.15. **Njoftim për fillimin e veprimtarisë** - nënkupton njoftimin që lëshohet nga organi kompetent për ata që posedojnë leje për ofrimin e shërbimeve private të sigurisë, për çdo marrëdhënie kontraktuale me klientin e tyre;

1.16. **Operator i mbikëqyrjes elektronike** - nënkupton punëtorin e specializuar të sigurimit, i autorizuar nga organi kompetent për të kryer shërbime të sigurimit në fushën e vëzhgimit elektronik të pronës nga Qendra e Kontrollit;

1.17. **Operator i Mbrojtjes së Afërt apo OMA** - nënkupton punëtorin e specializuar të sigurimit, i autorizuar nga organi kompetent me kartelë të identifikimit për të punuar në fushën e mbrojtjes së afërt;

1.18. **Pajisje e sigurimit** - nënkupton pajisjen që është lejuar nga organi kompetent;

1.19. **Përfaqësuesi i autorizuar** - nënkupton personin fizik, i cili autorizohet sipas legjislacionit të zbatueshëm për të vepruar në emër të aplikuesit ose poseduesit të lejes në fushën private të sigurisë;

1.20. **Personi që sigurohet** - nënkupton personin fizik të cilit i ofrohet mbrojtje e afërt nga kompania private e sigurimit, në pajtim me dispozitat e këtij ligji;

1.21. **Përdorimi i forcës** - nënkupton përdorimin e forcës fizike proporcionale me nivelin e kërcënimit nga ana e punëtorit të sigurimit, si dhe hapat gjatë përdorimit të forcës fizike kundër personit që reziston në një situatë të caktuar;

1.22. **Plani i sigurisë** - nënkupton dokumentin që përcakton qëllimin, formën dhe metodën e ofrimit të sigurisë nga poseduesi i lejes përmes personelit të sigurimit;

1.23. **Punëtor i sigurimit** - nënkupton punëtorin e sigurimit themelor ose punëtorin e specializuar i sigurimit;

1.23.1. **Punëtor i sigurimit themelor** - nënkupton personin e autorizuar me kartelë të identifikimit, të lëshuar nga organi kompetent për kryerjen e shërbimeve themelore të sigurimit;

1.23.2. **Punëtor i specializuar i sigurimit** - nënkupton personin e autorizuar me kartelë të identifikimit të lëshuar nga organi kompetent që është i specializuar në një shërbim përkatës sipas këtij ligji;

1.24. **Qendër e Kontrollit** - nënkupton objektin nga i cili mbikëqyren, regjistrohen, koordinohen dhe mbështeten të gjitha aktivitetet, informatat dhe raportet prej punëtorëve të sigurimit;

1.25. **Qen i sigurimit** - nënkupton qenin e trajnuar posaçërisht për të ruajtur pronën;

1.26. **Roje e Transportit të Parave të Gatshme (roje e TPG-së)** - nënkupton punëtorin e specializuar të sigurimit, i autorizuar me kartelë zyrtare të identifikimit në fushën e shërbimit të TPG-së;

1.27. **Shërbim i mbrojtjes së afërt** - nënkupton ofrimin e sigurisë fizike, ruajtjen dhe krijimin e hapësirës së sigurt për personin fizik që dëshiron të sigurohet;

1.28. **Shërbim privat i sigurisë** - nënkupton shërbimin e ofruar nga personat juridikë të pajisur me leje përkatëse për ofrimin e shërbimeve private të sigurisë me qëllim të mbrojtjes së personave dhe pasurisë, në përputhje me dispozitat e këtij ligji dhe ligjeve të tjera relevante;

1.29. **Shërbim i sigurimit të brendshëm vetanak** - nënkupton shërbimin themelor të sigurimit, të cilin e ofron personi juridik i regjistruar si shoqëri tregtare në objektet dhe zonat e destinuara vetëm për nevojat e tij, për sigurim të brendshëm, pa të drejtë të shitjes së shërbimit;

1.30. **Shërbim i sigurimit për infrastrukturë kritike** - nënkupton shërbimin e sigurimit, i cili ofrohet nga kompania private e sigurimit për sigurimin e infrastrukturës kritike, përmes punëtorëve të sigurimit të autorizuar, sipas kushteve dhe kriterëve të përcaktuara me këtë ligj dhe me legjislacionin përkatës;

1.31. **Shërbim i sigurimit të ngjarjeve publike** - nënkupton shërbimin e kontrollimit të hyrjes dhe daljes së pjesëmarrësve në ngjarje publike, sigurimin e mbarëvajtjes dhe rendit në hapësirën e caktuar të ngjarjes publike;

1.32. **Shërbim themelor i sigurimit** - nënkupton ruajtjen statike dhe të lëvizshme, përmes punëtorëve të sigurimit për mbrojtje fizike të pronës, ose të hapësirës së siguruar;

1.33. **Shërbim i Transportit të Parave të Gatshme dhe sendeve me vlerë (shërbim i TPG-së)** - nënkupton shërbimin që ofrohet nga kompania private e sigurimit, e pajisur me leje për shërbimin, sigurimin, përcjelljen gjatë marrjes, transportit dhe dorëzimit të parave të gatshme dhe sendeve me vlerë;

1.34. **Shërbim i vëzhgimit elektronik të pronës** - nënkupton ofrimin e vëzhgimit elektronik të hapësirës dhe pronës së siguruar nga kompania private e sigurimit, në pajtim me këtë ligj;

1.35. **Sistemi për Shërbimet Private të Sigurisë apo SShPS** - nënkupton sistem *online* që shfrytëzohet nga aplikuesi i shërbimeve private të sigurisë.

Neni 4

Shërbimet private të sigurimit

1. Shërbimet private të sigurimit ofrohen vetëm nga poseduesi i lejes dhe njoftimit për fillimin e veprimtarisë, lëshuar nga organi kompetent, në pajtim me këtë ligj.
2. Shërbimi i sigurimit të brendshëm mbulon vetëm nevojat e brendshme, pa të drejtë të shitjes së shërbimit të sigurimit për të tjerët, në pajtim me këtë ligj.
3. Shërbimet private të sigurimit ushtrohen vetëm përmes punëtorëve të sigurimit të autorizuar me kartela të identifikimit, të aprovuara nga organi kompetent, në pajtim me këtë ligj.
4. Para ofrimit të shërbimit privat të sigurisë kompania private e sigurimit që posedon leje, sipas llojit të ofrimit të shërbimeve në pajtim me këtë ligj, duhet të lidhë kontratë me shkrim me klientin që të ofrojë shërbime të sigurisë, duke treguar në mënyrë të qartë formën dhe qëllimin e ofrimit të shërbimit të sigurisë.

Neni 5

Kompania e huaj e sigurimit

1. Personi juridik nga vendi i huaj, i cili posedon leje në vendin e tij të origjinës për të ofruar shërbime private të sigurisë, mund të aplikojë për tu pajisur me leje në Republikën e Kosovës, nëse plotëson kriteret e njëjta sikurse aplikuesi vendor në pajtim me këtë ligj.
2. Lejet e huaja ofrohen në gjuhën e tyre origjinale dhe të përkthyer në gjuhët zyrtare të Republikës së Kosovës.
3. Shtetasi i huaj gëzon të drejtën të certifikohet dhe të pajiset me kartelë zyrtare të identifikimit, të aprovuar nga organi kompetent si punëtor i sigurimit, nëse i plotëson kriteret e përcaktuara me këtë ligj, kriteret e tjera të përcaktuara me legjislacionin përkatës për të huajt dhe të ketë njohuri elementare të njërës nga gjuhët zyrtare të Republikës së Kosovës.
4. Kompania e huaj e sigurimit sipas këtij neni nuk mund të aplikojë për t'u pajisur me leje për ofrimin e shërbimit të sigurisë sipas nenit 6, paragrafi 1, nënparagrafit 1.6 të këtij ligji.

Neni 6

Llojet e shërbimeve private të sigurisë

1. Llojet e shërbimeve private të sigurisë janë si në vijim:
 - 1.1. shërbimi themelor i sigurimit;
 - 1.2. shërbimi i mbrojtjes së afërt;
 - 1.3. shërbimi i transportit të parave të gatshme dhe sendeve me vlerë;
 - 1.4. shërbimi i vëzhgimit elektronik të pronës;
 - 1.5. shërbimi i sigurimit të ngjarjeve publike;
 - 1.6. shërbimi i sigurimit për infrastrukturë kritike.

KAPITULLI II

ORGANI KOMPETENT

Neni 7

Organi kompetent

1. Organ kompetent është Ministria përgjegjëse për Punë të Brendshme.

2. Njësia përgjegjëse për zbatimin e këtij ligji, përcaktohet nga organi kompetent në pajtim me rregullat e organizimit të brendshëm.

Neni 8 **Kompetencat e organit kompetent**

1. Organi kompetent ka këto kompetenca:

- 1.1. kryen funksionet lidhur me lëshimin e lejeve, certifikimin, ricertifikimin dhe njoftimet e përcaktuara me këtë ligj;
- 1.2. kryen monitorimin e aktiviteteve të kompanive private të sigurimit;
- 1.3. kryen inspektimin e aktiviteteve të kompanive private të sigurimit, punëtorëve të sigurimit dhe ndaj atyre që ushtrojnë veprimtarinë private të sigurimit për të zbatuar këtë ligj.
- 1.4. bën rekomandime, propozime, vërejtje dhe ndërmerr masa shtesë për ruajtjen dhe ngritjen e nivelit të sigurisë private;
- 1.5. lëshon, vazhdon, pezullon, apo revokon lejen dhe/apo kartelën e identifikimit;
- 1.6. shqipton dënimet me gjobë në pajtim me këtë ligj;
- 1.7. bën aprovimin e kartelave të identifikimit dhe evidentimin për punëtorët e sigurimit, ata që posedojnë leje dhe subjektet e tjera që kryejnë shërbime private të sigurisë, siç është përcaktuar me këtë ligj;
- 1.8. menaxhon sistemin elektronik për Shërbimet Private të Sigurisë;
- 1.9. organizon provim shtetëror për certifikim të punëtorëve të sigurimit, në pajtim me këtë ligj;
- 1.10. mban evidencën, si dhe dërgon dhe përditëson në përputhje me legjislacionin në fuqi për leje dhe licenca të dhënat për lejet e lëshuara sipas këtij ligji;
- 1.11. kryen detyra të tjera të përcaktuara me këtë ligj.

Neni 9 **E drejta e ankesës**

1. Kundër secilit vendim përfundimtar të nxjerrë sipas këtij ligji, lejohet ankesa në pajtim me rregullat e përcaktuara në Ligjin përkatës për Procedurën e Përgjithshme Administrative.
2. Organi epror që shqyrton ankesat sipas paragrafit 1 të këtij neni është Komisioni i Ankesave për Sigurinë Private, i themeluar me vendim të Ministrit.
3. Ministri, me akt nënligjor përcakton përbërjen e komisionit dhe mandatin e anëtarëve të komisionit.

KAPITULLI III **LEJET**

Neni 10 **Lejet për shërbimet private të sigurisë**

1. Personi juridik, i cili është i regjistruar në regjistrin e bizneseve në Republikën e Kosovës, ka

të drejtë të aplikojë për tu pajisur me leje për llojet e shërbimeve private të sigurisë, të listuara në nenin 6 të këtij ligji.

2. Kushdo që vepron dhe ofron shërbime private të sigurisë, duhet të ketë lejen përkatëse të përcaktuar në paragrafin 1 të këtij neni.

3. Aplikuesi duhet të plotësojë kushtet e përcaktuara me këtë ligj para se t'i jepet leja për të ofruar shërbimin e sigurimit.

4. Sipas këtij ligji, të gjitha lejet lëshohen për një periudhë pesë (5) vjeçare.

5. Poseduesi i lejes duhet të aplikojë për vazhdim të lejes jo më herët se nëntëdhjetë (90) ditë para skadimit të afatit, dhe jo më vonë se gjashtëdhjetë (60) ditë para skadimit të afatit.

6. Nëse organi kompetent refuzon kërkesën për vazhdim të lejes për arsye të mos plotësimit të kriterëve sipas këtij ligji, aplikuesi, të cilit i refuzohet kërkesa, obligohet që brenda tridhjetë (30) ditësh pas marrjes së vendimit të njoftojë klientët e tij për ndërprerje të kontratave.

7. Çdo leje është e vlefshme vetëm për llojin e caktuar të shërbimit privat të sigurimit të caktuar në atë leje, sipas këtij ligji.

8. Personave juridikë, të cilët merren me aktivitetet e industrisë së armëve, iu ndalohet të aplikojnë si kompani private e sigurimit.

9. Personat juridikë nga paragrafi 8 i këtij neni mund të aplikojnë për të marrë lejen për ofrimin e shërbimit të sigurimit të brendshëm.

10. Ministri me akt nënligjor përcakton kushtet, kriteret dhe procedurën për lëshimin e lejes për ofrimin e shërbimeve private të sigurisë.

Neni 11

Verifikimi i të kaluarës së aplikuesit

1. Verifikimi i të kaluarës kryhet për çdo aplikues para lëshimit të lejes për secilin lloj të shërbimit privat të sigurimit, të përcaktuar në nenin 6 të këtij ligji.

2. Verifikimi i të kaluarës duhet të bëhet për aplikuesin, themeluesit, pronarët dhe personat përgjegjës të tij.

3. Verifikimi i të kaluarës duhet të përsëritet nga organi kompetent para vazhdimit të lejes, në rastet e ndërrimit të pronarit, themeluesit dhe personit përgjegjës të tij dhe në çdo kohë nëse dyshon se personat sipas këtij paragrafi kanë kryer vepër penale.

4. Verifikimi i të kaluarës për aplikuesin dhe personat e përcaktuar në paragrafin 2 të këtij neni, përfshin:

4.1. verifikimin e detyrimeve financiare ndaj Administratës Tatimore të Kosovës dhe pagesën e gjobave ndaj organit kompetent;

4.2. verifikimin e të kaluarës penale nëpërmjet certifikatës mbi dënimin penal.

5. Organi kompetent refuzon kërkesën për lëshimin apo vazhdimin e lejes, nëse aplikuesi, apo cildo person nga paragrafi 2 i këtij neni, është dënuar me burgim me vendim të formës së prerë për vepër penale apo nëse ka obligime financiare ndaj Administratës Tatimore të Kosovës apo ndaj organit kompetent.

6. Ministri me akt nënligjor rregullon procedurën për kryerjen e verifikimit të së kaluarës.

Neni 12

Kushtet për marrjen e lejes për ofrimin e shërbimit themelor të sigurimit

1. Për tu pajisur me leje për ofrimin e shërbimit themelor të sigurimit aplikuesi duhet të plotësojë kushtet, si në vijim:

- 1.1. përfaqësuesi i autorizuar, i moshës së paku njëzet e një (21) vjeçare, të ketë shkollim të lartë në fushën e sigurisë apo tre (3) vite përvojë pune në të njëjtën fushë;
- 1.2. të ketë vlerësim pozitiv të verifikimit të së kaluarës;
- 1.3. të ketë së paku pesë (5) punëtorë të sigurimit themelor;
- 1.4. të ketë së paku një menaxher të sigurimit për shërbim themelor të sigurimit;
- 1.5. të dëshmojë që ka së paku qarkullim vjetor mbi dhjetë mijë euro (10.000 €) brenda vitit paraprak kalendarik ose kapital fillestar prej dhjetë mijë euro (10.000 €);
- 1.6. të dorëzojë kërkesën për aprovim të emblemës, shenjat dalluese dhe përshkrimin e uniformës së punës, sipas nenit 31 të këtij ligji.
- 1.7. të ketë zyrën për operim me adresë të caktuar;
- 1.8. nëse kompania private e sigurimit është e huaj, ajo duhet të ofrojë edhe kopjen e lejes në pajtim me paragrafin 2 të nenit 5 të këtij ligji.

2. Shoqëria tregtare që aplikon për sigurim të brendshëm duhet të plotësojë kushtet e paragrafit 1 të këtij neni, me përjashtim të nënparagrafit 1.3. të këtij neni. Kushti i numrit minimal të punëtorëve për sigurim të brendshëm është njëzet (20) punëtorë të sigurimit themelor.

Neni 13

Kushtet shtesë për leje për të ofruar shërbimet e specializuara të sigurimit

1. Për t'u pajisur me leje për ofrimin e shërbimit të mbrojtjes së afërt aplikuesi, përveç plotësimit të kushteve të përcaktuara në nenin 12 të këtij ligji, duhet të ketë edhe këto kushte:

- 1.1. së paku pesë (5) operatorë të mbrojtjes së afërt;
- 1.2. së paku një (1) menaxher të sigurimit për shërbim të mbrojtjes së afërt;
- 1.3. dhomën e certifikuar të ruajtjes së armëve në pajtim me Ligjin për Armë; dhe
- 1.4. Qendrën e Kontrollit.

2. Për t'u pajisur me leje për ofrimin e shërbimit të TPG-së, aplikuesi, përveç plotësimit të kushteve të përcaktuara në nenin 12 të këtij ligji, duhet të ketë:

- 2.1. së paku pesë (5) roje të TPG-së;
- 2.2. së paku një (1) menaxher të sigurimit për shërbim të TPG-së;
- 2.3. dhomën e certifikuar të ruajtjes së armëve, në pajtim me Ligjin për Armë;
- 2.4. Qendrën e Kontrollit; dhe

2.5. së paku një automjet të transportit të parave të gatshme të certifikuar nga organi kompetent.

3. Për t'u pajisur me leje për ofrimin e shërbimit të vëzhgimit elektronik të pronës, aplikuesi, përveç plotësimit të kushteve të përcaktuara në nenin 12 të këtij ligji, duhet të ketë:

3.1. së paku pesë (5) operatorë të mbikëqyrjes elektronike;

3.2. së paku një (1) menaxher të sigurimit për shërbim të vëzhgimit elektronik të pronës; dhe

3.3. Qendrën e Kontrollit.

4. Për t'u pajisur me leje për ofrimin e shërbimit të sigurimit të ngjarjeve publike, aplikuesi, përveç plotësimit të kushteve të përcaktuara në nenin 12 të këtij ligji, duhet të ketë:

4.1. së paku njëzet (20) punëtorë të sigurimit themelor;

4.2. së paku një (1) menaxher të sigurimit për shërbim themelor të sigurimit; dhe

4.3. Qendrën e Kontrollit.

5. Për t'u pajisur me leje për ofrimin e shërbimeve të sigurimit për infrastrukturë kritike, aplikuesi, përveç kushteve të përcaktuara në nenin 12 të këtij ligji, duhet të ketë:

5.1. së paku dhjetë (10) punëtorë të sigurimit për infrastrukturë kritike;

5.2. dhomën e certifikuar të ruajtjes së armëve në pajtim me Ligjin për Armët; dhe

5.3. Qendrën e Kontrollit;

5.4. të jetë i pajisur me certifikatën përkatëse të sigurisë, sipas ligjit përkatës për mbrojtjen e informacionit të klasifikuar.

6. Ministri me akt nënligjor përcakton rregullat dhe kriteret për zbatimin e këtij neni.

Neni 14

Lëshimi i kartelës së identifikimit për punëtorë të sigurimit

1. Poseduesi i lejes për ofrimin e shërbimeve private të sigurisë, duhet të aplikojë për kartelë të identifikimit për punëtorët e tij.

2. Kartela e identifikimit është e vlefshme vetëm për llojin e caktuar të sigurimit dhe ka afat katër (4) vjeçar nga data e lëshimit.

3. Me kërkesën e poseduesit të lejes për shërbimet private të sigurisë, sipas nenit 10 të këtij ligji, organi kompetent aprovon ose refuzon kartelën e identifikimit. Shpenzimet për të gjithë punëtorët e sigurimit i bart poseduesi i lejes.

4. Punëtori i sigurimit në pajtim me këtë ligj gjatë kryerjes së detyrave të tij, duhet të bartë kartelën zyrtare identifikuese në vend të dukshëm.

5. Operatorët e mbrojtjes së afërt duhet të bartin kartelën zyrtare të identifikimit, mirëpo mund të mos e ekspozojnë atë.

6. Nëse punëtori i sigurimit e ndërpret marrëdhënien e punës me poseduesin e lejes për shërbimet private të sigurisë, punëtori i sigurimit duhet t'a kthejë kartelën zyrtare të identifikimit tek poseduesi i lejes, brenda tre (3) ditëve nga ndërprerja e punës.

7. Poseduesi i lejes për shërbimet private të sigurisë, obligohet t'i pajisë me kartelë të identifikimit të gjithë punëtorët e vet të sigurimit. Poseduesi i lejes duhet të njoftoj organin kompetent për ndërprerjen e marrëdhënies të punës së punëtorit të sigurimit, në afatin prej tre (3) ditësh.

8. Ministri me akt nënligjor përcakton formën dhe përmbajtjen e kartelës zyrtare të identifikimit, mënyrën e aplikimit, lëshimit, afatin, kthimin dhe tërheqjen.

Neni 15

Kushtet e përgjithshme për pajisje me kartelë identifikimi

1. Çdo i punësuar tek poseduesi i lejes për shërbimet private të sigurisë për të marrë kartelën e identifikimit, duhet të plotësojë këto kushte:

- 1.1. të ketë arritur moshën tetëmbëdhjetë (18) vjeçare;
- 1.2. të ketë kaluar me sukses verifikimin e së kaluarës penale;
- 1.3. të ketë kaluar me sukses provimin shtetëror për punëtorë të sigurimit themelor;
- 1.4. të ketë aftësi fizike dhe mendore për të kryer detyrat e veta, dëshmuar me certifikatë të vlefshme shëndetësore për punë;
- 1.5. të ketë kontratë pune në fushën përkatëse.

2. Verifikimi së kaluarës penale sipas paragrafit 1, nënparagrafit 1.2. të këtij neni kryhet nga organi kompetent për të gjithë personat që aplikojnë për kartelë të identifikimit.

3. Aprovimi i kartelës së identifikimit nga organi kompetent refuzohet nëse aplikuesi është dënuar me burgim me vendim të formës së prerë për vepër penale.

4. Verifikimi i së kaluarës duhet të përsëritet para se të vazhdohet afati i kartelës së identifikimit dhe në çdo kohë, nëse dyshohet se punëtori i sigurimit ka kryer vepër penale.

5. Ministri me akt nënligjor përcakton rregullat dhe kriteret për kryerjen e verifikimit të së kaluarës për punëtorët e sigurimit.

Neni 16

Kushtet shtesë për kartelë të identifikimit për punëtorin e specializuar të sigurimit

1. Përveç plotësimit të kushteve të përcaktuara në nenin 15 të këtij ligji, operatori i mbrojtjes së afërt duhet të plotësojë edhe këto kushte:

- 1.1. të ketë arritur moshën njëzet e një (21) vjeçare;
- 1.2. të ketë së paku dy (2) vjet përvojë pune në fushën e sigurisë;
- 1.3. të ketë përfunduar shkollimin e mesëm;
- 1.4. të ketë kaluar me sukses provimin shtetëror për aftësimin për përdorim të armës, në pajtim me Ligjin përkatës për Armë.
- 1.5. të ketë kaluar me sukses provimin shtetëror për punëtorë të specializuar të sigurimit

për operator të mbrojtjes së afërt.

2. Përveç plotësimit të kushteve të përcaktuara në nenin 15 të këtij ligji, roja e TPG-së duhet të plotësojë edhe këto kushte:

- 2.1. të ketë arritur moshën njëzet e një (21) vjeçare;
- 2.2. të ketë së paku dy (2) vjet përvojë pune në fushën e sigurisë;
- 2.3. të ketë përfunduar shkollimin e mesëm;
- 2.4. të ketë kaluar me sukses provimin shtetëror për punëtorë të specializuar të sigurimit për roje të TPG-së;
- 2.5. të ketë kaluar me sukses provimin shtetëror për aftësimin për përdorim të armës, në pajtim me Ligjin për Armë.

3. Përveç plotësimit të kushteve të përcaktuara në nenin 15 të këtij ligji, mbajtësi i qenit duhet të plotësojë edhe këto kushte:

- 3.1. të ketë arritur moshën njëzet e një (21) vjeçare;
- 3.2. të ketë së paku dy (2) vjet përvojë pune në fushën e sigurisë;
- 3.3. të ketë përfunduar shkollimin e mesëm;
- 3.4. të ketë kaluar me sukses provimin shtetëror për punëtorë të specializuar të sigurimit për mbajtës të qenit.

4. Përveç plotësimit të kushteve të përcaktuara në nenin 15 të këtij ligji, operatori i mbikëqyrjes elektronike duhet të plotësojë edhe këto kushte:

- 4.1. të ketë arritur moshën njëzet e një (21) vjeçare;
- 4.2. të ketë përfunduar shkollimin e mesëm;
- 4.3. të ketë kaluar me sukses provimin shtetëror për punëtorë të specializuar të sigurimit për operator të mbikëqyrjes elektronike.

5. Përveç plotësimit të kushteve të përcaktuara në nenin 15 dhe atyre në këtë nen të këtij ligji për fushën përkatëse të përcaktuar ku operon, menaxheri i sigurimit , duhet të plotësojë edhe këto kushte:

- 5.1. të ketë arritur moshën njëzet e një (21) vjeçare;
- 5.2. të ketë së paku tri (3) vjet përvojë pune në fushën e sigurisë;
- 5.3. të ketë të përfunduar shkollimin e mesëm;
- 5.4. të ketë kaluar me sukses provimin shtetëror për punëtorë të specializuar të sigurimit për menaxher të sigurimit në fushën përkatëse.

6. Përveç plotësimit të kushteve të përcaktuara në nenin 15 të këtij ligji, punëtori i sigurimit për infrastrukturë kritike, duhet të plotësojë edhe këto kushte:

- 6.1. të ketë arritur moshën njëzet e një (21) vjeçare;

- 6.2. të ketë dy (2) vjet përvojë pune në fushën e sigurisë;
- 6.3. të ketë përfunduar shkollimin e mesëm;
- 6.4. të ketë kaluar me sukses provimin shtetëror për punëtorë të specializuar të sigurimit për infrastrukturë kritike;
- 6.5. të ketë kaluar me sukses provimin shtetëror për aftësimin për përdorim të armës, në pajtim me Ligjin për Armë;
- 6.6. të jetë i pajisur me certifikatën përkatëse të sigurisë, sipas ligjit përkatës për mbrojtjen e informacionit të klasifikuar.

Neni 17

Vendimet e organit kompetent

1. Organi kompetent vendos për aprovim ose refuzim të kërkesës dhe informon aplikuesin me vendim me shkrim brenda tridhjetë (30) ditësh, nga dita e dorëzimit të kërkesës sipas këtij ligji.
2. Për procedurat sipas këtij ligji, nuk zbatohet miratimi në heshtje sipas Ligjit përkatës për procedurën e përgjithshme administrative.
3. Aplikuesi ka të drejtë të ankohet lidhur me vendimin për refuzimin e kërkesës brenda tridhjetë (30) ditëve pas marrjes së vendimit.
4. Ankesa sipas paragrafit 3 të këtij neni parashtrohet në Komisionin e Ankesave për Sigurinë Private, sipas nenit 9 të këtij ligji.

Neni 18

Qendra e Kontrollit

1. Për marrjen e lejes për kryerjen e shërbimeve të specializuara të sigurimit, aplikuesi duhet të ketë të certifikuar Qendrën e Kontrollit.
2. Organi kompetent, para lëshimit të lejes sipas nenit 13 të këtij ligji, përmes inspektimit konstaton se Qendra e Kontrollit i plotëson kushtet minimale të kërkuara.
3. Për shërbimet e specializuara të sigurimit të cilat veprojnë njëzet e katër (24) orë në ditë, Qendra e Kontrollit duhet të jetë e hapur njëzet e katër (24) orë në ditë, shtatë (7) ditë në javë.
4. Qendra e Kontrollit duhet të shërbejë vetëm për një kompani private të sigurimit.
5. Në rast ndryshimi të lokacionit të Qendrës së Kontrollit, poseduesi i lejes duhet që brenda tridhjetë (30) ditësh para zhvendosjes, apo ndërrimit të lokacionit të Qendrës së Kontrollit, të njoftojë organin kompetent dhe të bëjë kërkesë për certifikim të Qendrës së re të Kontrollit.
6. Ministri me akt nënligjor, përcakton mënyrën e aplikimit, kushtet për certifikimin e Qendrës së Kontrollit dhe mënyrën e kryerjes së inspektimit.

Neni 19

Njoftimi për caktimin e operatorit të mbrojtjes së afërt për personin që sigurohet

1. Kompania private e sigurimit, e cila posedon leje që të ofrojë shërbime të mbrojtjes së afërt, duhet të marrë njoftimin nga organi kompetent, para se të caktojë një, ose më shumë operatorë të mbrojtjes së afërt, për personin që sigurohet.

2. Bazuar në verifikimin e së kaluarës penale për personin që dëshiron të sigurohet, organi kompetent jep apo refuzon këtë njoftim për kompaninë.

3. Aplikimi për marrjen e njoftimit duhet të përfshijë këto dokumente:

3.1. lejen për ofrimin e shërbimeve të mbrojtjes së afërt;

3.2. vlerësimin preliminar nga kompania private e sigurimit për ofrimin e shërbimeve për mbrojtje të afërt, ku deklarohet të dhënat dhe arsyet pse personi që sigurohet kërkon të caktohet operator i mbrojtjes së afërt.

4. Ministri me akt nënligjor përcakton kushtet dhe kriteret për t'u pajisur me njoftim për të caktuar operator të mbrojtjes së afërt për personin që sigurohet.

Neni 20

Njoftimi për fillimin e veprimtarisë

1. Kompania private e sigurimit, e cila ofron shërbime të caktuara ndaj klientëve sipas dispozitave të këtij ligji, është e obliguar që të marrë njoftimin nga organi kompetent për çdo marrëdhënie kontraktuale me klientin.

2. Poseduesi i lejes për ofrimin e shërbimeve private të sigurisë nuk mund të fillojë ushtrimin e veprimtarisë para se organi kompetent të ketë dhënë njoftimin për fillimin e veprimtarisë.

3. Njoftimi për fillimin e veprimtarisë mund të jepet pas dorëzimit të këtyre dokumenteve:

3.1. lejen përkatëse për ofrimin e shërbimeve private të sigurisë;

3.2. dëshminë e policës së sigurimit siç është përcaktuar me këtë ligj;

3.3. kontratën me shkrim me klientin;

3.4. planin e sigurisë.

4. Poseduesi i lejes për shërbime të sigurimit të brendshëm, duhet të marrë njoftimin nga organi kompetent para fillimit të veprimtarisë sipas dispozitave të këtij ligji.

5. Njoftimi për fillimin e veprimtarisë për shërbim të sigurimit të brendshëm mund të jepet pas dorëzimit të këtyre dokumenteve:

5.1. leja për ofrimin e shërbimeve të sigurimit të brendshëm;

5.2. dëshmia e policës së sigurimit siç është përcaktuar me këtë ligj;

5.3. rregullorja e brendshme për çdo zonë të destinuar;

5.4. plani i sigurisë.

6. Poseduesi i lejes për ofrimin e shërbimeve private të sigurisë është i obliguar ta njoftojë organin kompetent më së largu dyzet e tetë (48) orë pas ndërprerjes së kontratës me klientin.

7. Poseduesi i lejes për shërbim të sigurimit të brendshëm është i obliguar të njoftojë organin kompetent më së largu dyzet e tetë (48) orë pas ndërprerjes së aktivitetit.

8. Ministri me akt nënligjor, përcakton kushtet dhe kriteret për njoftim për fillimin e veprimtarisë, formën e rregullores së brendshme dhe planin e sigurisë.

Neni 21**Përgjegjësia e kompanisë private të sigurimit për kompensimin e dëmit dhe sigurimi i përgjegjësishë**

1. Kompania private e sigurimit, ose poseduesi i lejes, para fillimit të veprimtarisë duhet të sigurohet ndaj përgjegjësishë për kompensimin e dëmeve të cilat mund t'i shkaktohen klientit gjatë ushtrimit të shërbimeve private të sigurisë, apo personit të tretë në lidhje me sigurinë private.
2. Kompanitë private të sigurimit duhet të posedojnë policën përkatëse të sigurimit, të lëshuar nga një kompani e sigurimeve e licencuar në Kosovë, e cila ofron mbulesë adekuate për kontratat e tyre të nënshkruara.
3. Dëshmia për policën adekuate të sigurimit duhet t'i dorëzohet organit kompetent para marrjes së njoftimit për fillimin e veprimtarisë.
4. Polica e sigurimit nga paragrafi 3 i këtij neni duhet të ripërtërihet dhe i nënshtrohet kontrollimeve të inspektorëve.
5. Polica e sigurimit, me të dhënat e domosdoshme, duhet të përfshihet në kontratën, e cila lidhet në mes të kompanisë private të sigurimit dhe klientit të saj.

Neni 22**Kontrata në mes të kompanisë private të sigurimit dhe klientit**

1. Para ofrimit të shërbimit privat të sigurisë, poseduesi i lejes sipas llojit të shërbimeve në pajtim me këtë ligj, duhet të lidhë kontratë me shkrim me klientin që të ofrojë shërbime të sigurisë, duke treguar në mënyrë të qartë qëllimin dhe formën e ofrimit të shërbimit të sigurisë.
2. Kontrata duhet të përmbajë së paku të dhënat si në vijim:
 - 2.1. emrin dhe adresën e klientit, i cili lidh marrëdhënie kontraktuale me poseduesin e lejes;
 - 2.2. emrin e kompanisë private të sigurimit, numrin e lejes dhe llojin e ofrimit të shërbimit privat të sigurisë;
 - 2.3. datën e fillimit të shërbimit privat të sigurimit, kohën dhe kohëzgjatjen e kontratës dhe mbulimin e hapësirës së siguruar;
 - 2.4. numrin e punëtorëve të angazhuar të sigurimit.

KAPITULLI IV**MASAT, AUTORIZIMET DHE DETYRAT E PUNËTORËVE TË SIGURIMIT****Neni 23****Detyrimi për punëtorët e sigurimit**

Punëtori i sigurimit dhe të punësuarit në kompaninë private të sigurimit nuk lejohet të përdorin pije alkoolike dhe lëndë narkotike para dhe gjatë ushtrimit të shërbimeve private të sigurisë.

Neni 24**Papajtueshmëria në ushtrimin e detyrës**

Asnjë themelues, pronar, përfaqësues i autorizuar, punëtor siguri apo i punësuar tek poseduesi i lejes nuk mund të jetë i punësuar në të njëjtën kohë nga institucionet shtetërore të

sigurisë si: Policia e Kosovës, Agjencia e Inteligjencës së Kosovës, Agjencia Pyjore e Kosovës, Shërbimi Korrektues, Forca e Sigurisë së Kosovës dhe organi kompetent.

Neni 25

Autorizimet dhe detyrat e poseduesve të lejes për ushtrimin e shërbimeve private të sigurisë

1. Poseduesi i lejes për shërbimet private të sigurisë duhet të kujdeset që punëtori i sigurimit kryen vetëm detyrën përkatëse, për të cilën është i autorizuar me kartelë të identifikimit.
2. Poseduesi i lejes për shërbimet themelore të sigurimit ofron shërbimin e sigurimit vetëm në hapësirën e siguruar, objektin, pronën dhe personat në hapësirën e siguruar.
3. Poseduesi i lejes për shërbimet e mbrojtjes së afërt ofron shërbimin për mbrojtjen e jetës së personit që sigurohet në hapësirat e caktuara, ose gjatë lëvizjes.
4. Poseduesi i lejes për shërbimet private të sigurisë, për kryerjen e shërbimeve të mbrojtjes së afërt duhet të sigurojë që:
 - 4.1. operatorët e mbrojtjes së afërt të jenë të pajisur me mjete që u mundësojnë komunikim të vazhdueshëm përmes radiolidhjeve me qendrën e tyre të kontrollit, dhe me njëri-tjetrin kur janë të caktuar në të njëjtën detyrë;
 - 4.2. operatorët e mbrojtjes së afërt, të jenë të pajisur me pajisje të sigurimit dhe me armë zjarri në pajtim me këtë ligj dhe me ligjin përkatës për armë.
5. Poseduesi i lejes për shërbimet e transportit të parave të gatshme, bën ruajtjen e parave të gatshme dhe sendeve tjera me vlerë gjatë marrjes, transportimit dhe dorëzimit me automjete të certifikuar nga organi kompetent.
6. Poseduesi i lejes për shërbimet private të sigurisë, për kryerjen e shërbimeve të TPG-së, duhet të sigurojë që:
 - 6.1. rojet e TPG-së, janë të pajisur me mjete që iu mundësojnë komunikim të vazhdueshëm përmes radiolidhjeve me qendrën e tyre të kontrollit dhe me njëri-tjetrin, kur janë të caktuar në të njëjtën detyrë;
 - 6.2. Qendra e Kontrollit të ketë sistemin e GPS-së për përcjelljen e lëvizjes së automjeteve që përdoren nga TPG;
 - 6.3. rojet e TPG-së, të jenë të pajisur me pajisje të sigurimit dhe me armë zjarri në pajtim me këtë ligj dhe me ligjin përkatës për armë.
7. Poseduesi i lejes për shërbimet e sigurimit për infrastrukturë kritike ofron shërbimin e sigurimit për hapësirën e siguruar, asetet me rëndësi të veçantë, objektin dhe pronën në hapësirën e siguruar të objekteve të përcaktuara, sipas legjislacionit përkatës për infrastrukturë kritike.
8. Poseduesi i lejes që ofron shërbimin e vëzhgimit elektronik të pronës, duhet të sigurojë se vëzhgimi elektronik është i kufizuar në:
 - 8.1. mbikëqyrjen e lëvizjes në dhe/ose përreth hapësirës së siguruar;
 - 8.2. identifikimin e prezencës së personave të paautorizuar në dhe/ose përreth hapësirës së siguruar;
 - 8.3. të vërejturit e pranisë së zjarrit në dhe/ose përreth hapësirës së siguruar.

9. Shenjat e dukshme dhe të dallueshme të njoftimit, të cilat informojnë publikun për prezencën e sistemeve elektronike, duhet të vendosen në dhe/ose përreth hapësirës së siguruar.

10. Poseduesi i lejes për shërbimet e vëzhgimit elektronik të pronës duhet të ketë në gatishmëri të përhershme së paku dy (2) punëtorë të sigurimit themelor (patrullë), të cilët në rast të lëshimit të alarmit ose me kërkesë të Qendrës së Kontrollit, vlerësojnë situatën, ndërmarrin masat e nevojshme në hapësirën e siguruar dhe raportojnë tek Qendra e Kontrollit.

11. Poseduesi i lejes për shërbimet e sigurimit të ngjarjeve publike bën kontrollimin e hyrjes dhe daljes së pjesëmarrësve në ngjarje, siguron mbarëvajtjen, rendin dhe qetësinë në hapësirën e caktuar të ngjarjes publike.

12. Poseduesit të lejes për shërbimet private të sigurisë dhe punëtorëve të sigurimit i ndalohet përdorimi i mjeteve të përgjimit të çfarëdo lloji.

13. Poseduesi i lejes për ofrimin e shërbimeve private të sigurisë, ose klienti, nuk mund të urdhërojë punëtorin e sigurimit të përdorë forcën, apo pajisjet dhe mjetet e tjera shtrënguese që janë në kundërshtim me dispozitat e këtij ligji.

14. Personat juridikë që ushtrojnë aktivitete në ambiente të jetës së natës dhe angazhojnë punëtorë të sigurimit dhe të cilat veprojnë pas orës 23:00 deri në orën 06:00 të mëngjesit, janë të obliguar të vendosin sisteme të vëzhgimit me kamera në hyrje/dalje dhe në hapësirën e siguruar, si dhe të kenë pajisje për ruajtjen e incizimeve. Personat juridikë që nuk kontraktojnë posedues të lejes për shërbimet e vëzhgimit elektronik të pronës, sipas këtij ligji, incizimet me video duhet ti ruajnë së paku tre (3) muaj nga data e regjistrimit.

15. Personat juridikë sipas paragrafit 14 të këtij neni, në rastet kur punëtorët e sigurimit përfshihen në veprat penale, duhet të përcjellin incizimet e regjistruara tek organi kompetent, sipas kërkesës.

16. Ministri me akt nënligjor, përcakton autorizimet dhe detyrat e poseduesit të lejes për ofrimin e shërbimeve private të sigurisë në pajtim me këtë ligj.

Neni 26

Autorizimet dhe detyrat e punëtorëve të sigurimit

1. Punëtorët e sigurimit kanë të drejtë të ndërmarrin këto veprime:

1.1. të tërheqin vërejtje ndaj personave të cilët pa autorizim përkatës afrohen në hapësirën e siguruar, objektin ose vendin e siguruar;

1.2. të kërkojnë nga personi i cili rrezikon sigurinë e personave, apo pasurisë, ose vepron në kundërshtim me rregullat e hapësirës së siguruar që menjëherë të ndalojë veprimet;

1.3. të identifikojnë personat dhe automjetet gjatë hyrjes dhe daljes nga hapësira e siguruar, nëse është e domosdoshme për njerëzit ose pronën.

2. Me pëlqimin e personit, punëtori i sigurimit mund të kontrollojë gjësendet dhe automjetet gjatë hyrjes dhe daljes në hapësirën e siguruar. Nëse personi refuzon t'i kontrollohen gjësendet dhe automjeti, punëtori i sigurimit mund t'i refuzojë hyrjen ose daljen nga hapësira e siguruar.

3. Me pëlqimin e personit, punëtori i sigurimit mund të kryejë kontrollimin me prekje:

3.1. kontrollimet me prekje duhet të kryhen nga punëtori i sigurimit i gjinisë së njëjtë;

3.2. nëse personi refuzon pëlqimin për kontrollimin me prekje gjatë tentimit për të hyrë në

hapësirën e siguruar, punëtori i sigurimit mund të refuzojë hyrjen e personit;

3.3. nëse personi refuzon kontrollimin me prekje gjatë tentimit për të dalë nga hapësira e siguruar, punëtori i sigurimit ndalon personin dhe menjëherë njofton Policinë e Kosovës.

4. Punëtori i sigurimit mund të ndalojë personin vetëm nëse dyshon se personi ka kryer, ose është duke kryer, ose do të kryejë një vepër penale.

5. Nëse punëtori i sigurimit e ndalon personin apo automjetin duke dalë nga hapësira e siguruar dhe identifikon ndonjë keqpërdorim, punëtori i sigurimit duhet menjëherë të njoftojë Policinë e Kosovës.

6. Punëtori i sigurimit ka të drejtë t'i sekuestrojë përkohësisht sendet e kundërligjshme në hapësirën e siguruar dhe duhet ta njoftojë për këtë Policinë e Kosovës, si dhe menaxherin e sigurimit.

7. Kufizimi i përkohshëm i lëvizjes së personit apo automjetit, lejohet vetëm deri në arritjen e policisë por jo më shumë se dy (2) orë nga momenti i ndalimit.

8. Punëtorët e sigurimit mund ta përdorin forcën vetëm në pajtim me këtë ligj.

9. Punëtorët e sigurimit mund të përdorin vetëm pajisjet e sigurimit në pajtim me këtë ligj.

10. Zyrtarët e zbatimit të ligjit gjatë kryerjes së detyrës zyrtare, përjashtohen nga kontrollimi që e bëjnë punëtorët e sigurimit.

11. Në raste urgjente, shërbimet e urgjencës përjashtohen nga kontrollet e punëtorëve të sigurimit.

12. Punëtorët e sigurimit duhet të identifikohen para policisë në bazë të kërkesës.

13. Askush, në kontratën e punës të së cilit përshkruhen detyra e qëllime të ndryshme nga ato të shërbimeve private të sigurisë, nuk mund të veprojë si punëtor i sigurimit.

14. Ministri me akt nënligjor përcakton autorizimet dhe detyrat e punëtorëve të sigurimit.

Neni 27

Përdorimi i forcës nga punëtori i sigurimit

1. Punëtori i sigurimit mund të përdorë forcën proporcionale kundër sulmit të drejtpërdrejtë të atëçastshëm dhe real që përbën kërcënim të pashmangshëm ndaj jetës dhe/apo integritetit trupor të tij apo ndonjë personi tjetër.

2. Gjatë përdorimit të forcës proporcionale, askush nuk mund t'i nënshtrohet torturës, trajtimit ose ndëshkimit çnjerëzor, ose poshtërues.

3. Përdorimi i forcës, si term i përdorur në këtë ligj, përfshin përdorimin e forcës fizike dhe pajisjeve të sigurisë.

4. Në rastin e përdorimit të forcës, punëtori i sigurimit, menaxheri i sigurimit ose poseduesi i lejes është i detyruar të njoftojë menjëherë Policinë e Kosovës.

5. Punëtori i sigurimit që i shkakton lëndime personit duhet të sigurohet se pala e lënduar do të marrë ndihmën mjekësore menjëherë pas marrjes së situatës nën kontroll.

6. Përveç përcaktimeve në paragrafin 4 të këtij neni, poseduesi i lejes, përmes personit

përgjegjës, duhet që brenda dyzet e tetë (48) orësh të raportojë me shkrim te organi kompetent për çfarëdo incidenti, kufizim të lëvizjes, lëndim të personit ose vepër penale.

7. Gjatë përdorimit të forcës proporcionale punëtori i sigurimit duhet t'i ndjekë hapat në vijim:

7.1. hapi i parë - prania fizike e punëtorit të sigurimit në vendngjarje;

7.2. hapi i dytë - tërheqja e vërejtjes ndaj personit;

7.3. hapi i tretë - vënia nën kontroll të personit pa përdorimin e pajisjeve;

7.4. hapi i katërt - përdorimi i sprejit lotsjellës ose shkopit të sigurisë vetëm në pjesët muskulore të duarve dhe këmbëve të personit;

7.5. hapi i pestë - përdorimi i forcës që mund të shkaktojë lëndim të rëndë të personit.

8. Përdorimi i forcës duhet të ndërpritet në momentin kur punëtori i sigurimit e ka situatën nën kontroll.

9. Ministri, me akt nënligjor përcakton mënyrën, rregullat dhe procedurën për zbatim të këtij neni.

Neni 28

Bartja dhe përdorimi i armëve të zjarrit

1. Operatorët e mbrojtjes së afërt, rojet e TPG-së dhe punëtorët e sigurimit për infrastrukturë kritike, të autorizuar me kartelë të identifikimit, mund të armatosen vetëm në pajtim me këtë ligj dhe me ligjin përkatës për armë.

2. Operatorët e mbrojtjes së afërt, rojet e TPG-së dhe punëtorët e sigurimit për infrastrukturë kritike të autorizuar me kartelë të identifikimit, duhet të armatosen si vijon:

2.1. armët e zjarrit të autorizuar për operatorët e mbrojtjes së afërt janë kategori B1, siç është përcaktuar në ligjin përkatës për armë, me velenxën mekanike të sigurisë dhe municion të kalibrit 9x19 mm, me përjashtim të revolverëve.

2.2. armët e autorizuar për rojet e TPG-së janë kategori B1, siç është përcaktuar në ligjin përkatës për armë me velenxën mekanike të sigurisë dhe municion të kalibrit 9x19mm, me përjashtim të revolverëve dhe minimum një armë B1 gjysmë automatike, jo më të gjatë se 60cm me kalibër 9x19 mm për çdo automjet transportues të TPG-së.

2.3. armët e autorizuar për punëtorët e sigurimit për infrastrukturë kritike janë kategori B1, siç është përcaktuar në ligjin përkatës për armë, me velenxën mekanike të sigurisë dhe municion të kalibrit 9x19 mm, me përjashtim të revolverëve.

3. Operatorët e mbrojtjes së afërt, rojet e TPG-së, dhe punëtorët e sigurimit për infrastrukturë kritike duhet të armatosen vetëm me armë të autorizuar dhe t'i bartin vetëm kur janë në detyrë. Pas përfundimit të orarit të punës armët e zjarrit duhet t'i dorëzojnë në vendin e ruajtjes sipas ligjit përkatës për armë.

4. Përjashtimisht nga paragrafi 3 i këtij neni, punëtorët e sigurimit për infrastrukturë kritike mund t'ia dorëzojnë armën punëtorit të sigurimit i cili e pranon detyrën tek vendi i tyre i punës.

5. Operatorët e mbrojtjes së afërt, rojet e TPG-së dhe punëtorët e sigurimit për infrastrukturë kritike, mund të përdorin armët e tyre të autorizuar vetëm si zgjidhje e fundit, kur mjetet tjera janë të pamjaftueshme për të mbrojtur veten, personin e siguruar, transportin e parave të

gatshme dhe infrastrukturën kritike nga sulmi i pashmangshëm për jetë.

6. Për përdorimin e armës së autorizuar të zjarrit, duhet të ndiqen hapat si në vijim:

6.1. hapi i parë - nxjerrja e armës së zjarrit;

6.2. hapi i dytë - tërheqja e vërejtjes së personit, se punëtari i sigurimit do të shtjerë dhe futja e plumbit në tytë në armën e zjarrit;

6.3. hapi i tretë - drejtimi i armës së zjarrit kundrejt personit;

6.4. hapi i katërt - lirim i velenxës së sigurisë;

6.5. hapi i pestë - të shtënit me armë të zjarrit.

7. Operatori i mbrojtjes së afërt, roja e TPG-së ose punëtorët e sigurimit për infrastrukturë kritike janë të obliguar që drejtpërdrejt, ose përmes Qendrës së Kontrollit, të njoftojnë Policinë e Kosovës, menjëherë pasi është shtënë me armën e zjarrit.

8. Nëse hetimi i Policisë së Kosovës zbulon se e shtëna me armë zjarri nuk ishte në pajtim me këtë ligj, atëherë punëtorit të sigurimit menjëherë i hiqet kartela e identifikimit nga organi kompetent.

9. Punëtorit të sigurimit i cili posedon armë të paautorizuar të zjarrit, sa është në detyrë, menjëherë i hiqet kartela e identifikimit. Nëse konstatohet përgjegjësia e poseduesit të lejes për shërbimet private të sigurisë, leja i hiqet edhe kompanisë private të sigurimit.

10. Ministri me akt nënligjor përcakton kushtet dhe kriteret për pajisjen me armë, mënyrën dhe përdorimin e armës së zjarrit, si dhe ruajtjen e armës së zjarrit, trajtimin e armëve nga punëtorët e sigurimit dhe kompania private e sigurimit, në pajtim me këtë ligj.

Neni 29 **Qentë e sigurimit**

1. Përdorimi i qenve të sigurimit lejohet për aktivitetet e shërbimeve private të sigurisë.
2. Poseduesi i lejes duhet të ketë një policë siguri për përdorimin e qenve të sigurimit për dëmet që mund t'i shkaktojë palës së tretë.
3. Ministri me akt nënligjor përcakton rregullat procedurat dhe kriteret për zbatimin e këtij neni.

Neni 30 **Pajisjet e sigurimit**

1. Punëtorët e sigurimit mund të përdorin vetëm pajisjet e sigurimit të lejuara me këtë ligj.
2. Punëtorëve të sigurimit ju ofrohen nga poseduesi i lejes që i punëson pajisjet e domosdoshme për t'i përmbushur detyrat e tyre.
3. Pajisja e sigurimit duhet të përdoret nga punëtorët e sigurimit vetëm për aktivitetet e sigurimit, për të cilat ata janë të autorizuar me kartelë të identifikimit.
4. Pajisjet bazike të sigurimit që mund të përdoren nga të gjithë punëtorët e sigurimit janë si në vijim:

- 4.1. shufra;
- 4.2. prangat;
- 4.3. sprej lotsjellës;
- 4.4. pajisja e komunikimit apo radiolidhja;
- 4.5. jeleku antiplumb;
- 4.6. helmeta;
- 4.7. dylbitë;
- 4.8. maska kundër gazit;
- 4.9. detektori me rreze X;
- 4.10. detektorët për zbulimin e metalit;
- 4.11. detektorët që kalohet përmes tyre; dhe
- 4.12. bllokuesi i rrotave.

5. Pajisjet e sigurimit që duhet t'i bartin punëtorët e sigurimit themelor gjatë gjithë kohës sa janë në detyrë, janë si në vijim:

- 5.1. shufra;
- 5.2. prangat;
- 5.3. pajisjet e komunikimit apo radiolidhje; dhe
- 5.4. sprej lotsjellës.

6. Pajisjet e sigurimit që duhet t'i bartin operatorët e mbrojtjes së afërt, gjatë gjithë kohës sa janë në detyrë, janë si në vijim:

- 6.1. arma e zjarrit;
- 6.2. shufra;
- 6.3. prangat;
- 6.4. sprej lotsjellës; dhe
- 6.5. pajisja e komunikimit apo radiolidhja.

7. Pajisjet e sigurimit të nevojshme për kryerjen e transportit të parave të gatshme nga rojet e TPG-së, gjatë gjithë kohës sa janë në detyrë, janë si në vijim:

- 7.1. arma e zjarrit;
- 7.2. shufra;
- 7.3. prangat;

- 7.4. sprej lotsjellës;
- 7.5. jeleku antiplumb;
- 7.6. pajisjet e komunikimit apo radiolidhja;
- 7.7. maska kundër gazit;
- 7.8. automjeti i blinduar dhe certifikuar nga organi kompetent.

8. Pajisjet e sigurimit që duhet t'i bartin punëtorët e sigurimit për infrastrukturë kritike, gjatë gjithë kohës sa janë në detyrë, janë si në vijim:

- 8.1. arma e zjarrit;
- 8.2. shufra;
- 8.3. prangat;
- 8.4. sprej lotsjellës; dhe
- 8.5. pajisjet e komunikimit apo radiolidhja.

9. Operatorët e mbikëqyrjes elektronike mbikëqyrin pajisjet dhe sistemet si në vijim:

- 9.1. alarmet kundër hyrjes së paautorizuar;
- 9.2. sistemet e kontrollit për qasje elektronike;
- 9.3. sistemin e kamerave CCTV;
- 9.4. ruajtjen e imazheve filmike në pajisje për ruajtjen e të dhënave;
- 9.5. pajisjet për vëzhgim optik;
- 9.6. mjetet e përcjelljes përmes GPS të automjeteve dhe pajisjet e tjera, sipas legjislacionit në fuqi.

10. Ministri me akt nënligjor përcakton llojin, ruajtjen, përdorimin, evidentimin, si dhe kriteret e kërkuara për pajisjet e sigurisë.

Neni 31

Uniforma, shenjat dalluese dhe emblemat

- 1. Punëtorët e sigurimit duhet të kenë të veshur uniformat e punës, të aprovuara nga organi kompetent, gjatë tërë kohës sa janë në detyrë.
- 2. Poseduesi i lejes për shërbimet e mbrojtjes së afërt mund të autorizojë operatorët e mbrojtjes së afërt që të mos veshin uniformë.
- 3. Poseduesi i lejes për ofrimin e shërbimeve private të sigurisë, është i obliguar që me shpenzimet e tij t'i pajisë me uniforma të punës punëtorët e sigurimit.
- 4. Ministri me akt nënligjor përcakton llojin dhe përmbajtjen e emblemës dhe shenjave dalluese, sinjalet ndriçuese dhe kthimin e uniformës nga punëtori i sigurimit.

Neni 32

Trajnimi themelor profesional

1. Personi i cili do të punojë si punëtor i sigurimit duhet të kryejë trajnimin themelor profesional dhe të certifikohet nga institucioni trajnues për ofrimin e trajnimeve në fushën private të sigurisë që posedon leje nga organi kompetent.
2. Personi nga paragrafi 1 i këtij neni pajiset me certifikatë të lëshuar nga organi kompetent që dëshmon se ka marrë njohuri dhe ka kaluar provimin shtetëror për punëtor të sigurimit themelor.
3. Të gjitha temat e programit të trajnimit themelor profesional duhet të aprovohen nga organi kompetent.
4. Ministri me akt nënligjor, përcakton mënyrën e aplikimit, procedurat e trajnimit, provimit shtetëror, testimit, certifikimit të punëtorëve të sigurimit themelor nga organi kompetent, temat, aprovimin e plan-programeve për trajnim themelor profesional, si dhe mënyrën e ofrimit të trajnimit dhe certifikimit nga institucionet trajnuese.

Nen 33

Trajnimi për punëtorë të specializuar të sigurimit

1. Punëtori i specializuar i sigurimit duhet të kryejë trajnimin e specializuar përkatës, të cilin e ofron institucioni trajnues që posedon leje nga organi kompetent.
2. Personi që aplikon për trajnim të specializuar duhet të ketë të kryer provimin shtetëror për punëtor të sigurimit themelor.
3. Personi nga paragrafi 1 i këtij neni pajiset me certifikatë, të lëshuar nga organi kompetent që dëshmon se ka marrë njohuri dhe ka kaluar provimin shtetëror përkatës për punëtor të specializuar të sigurimit.
4. Trajnimet e specializuara kryhen për:
 - 4.1. operator i mbrojtjes së afërt;
 - 4.2. roje e TPG-së;
 - 4.3. punëtor i sigurimit për infrastrukturë kritike;
 - 4.4. mbajtës i qenve;
 - 4.5. operator i Qendrës së Kontrollit;
 - 4.6. menaxher i sigurimit për shërbimet themelore të sigurimit;
 - 4.7. menaxher i sigurimit për shërbimet e mbrojtjes së afërt;
 - 4.8. menaxher i sigurimit për shërbimet e transportit të parave të gatshme dhe sendeve me vlerë;
 - 4.9. menaxher i sigurimit për shërbimet e mbikëqyrjes elektronike;
 - 4.10. menaxher i sigurimit për shërbimet e infrastrukturës kritike.
5. Të gjitha institucionet që ofrojnë trajnime, duhet të posedojnë leje nga organi kompetent.

6. Të gjitha temat e programit për trajnime të specializuara, për çdo fushë të caktuar sipas paragrafit 4 të këtij neni, duhet të aprovohen nga organi kompetent.

7. Punëtorëve të sigurimit që u lejohet mbajtja dhe përdorimi i armës së zjarrit, sipas këtij ligji, duhet të përfundojnë edhe trajnimin praktik dhe taktik për gjuajtje me armë të zjarrit dhe të kalojnë provimin shtetëror për aftësim të përdorimit të armës.

8. Personi që posedon certifikatën dhe dëshmon se me sukses ka përfunduar trajnimin e specializuar në fushën përkatëse nga institucioni trajnues, duhet të kalojë provimin shtetëror të organizuar nga organi kompetent, si dhe t'i plotësojë kriteret e tjera të përcaktuara sipas këtij ligji, para se t'i lëshohet kartela e identifikimit.

9. Ministri me akt nënligjor përcakton mënyrën, rregullat dhe procedurat për zbatim të këtij neni.

Neni 34

Trajnimi rifreskues/ricertifikues

1. Ricertifikimi është i obligueshëm për çdo vit për: operatorët e mbrojtjes së afërt, rojet e TPG-së, punëtorët e sigurimit për infrastrukturë kritike dhe punëtorët e sigurimit të cilëve iu lejohen armët nga organi kompetent sipas këtij ligji.

2. Trajnimi rifreskues mbahet një herë në vit në poligonet që posedojnë leje sipas ligjit përkatës për armë dhe ka për qëllim rifreskimin dhe marrjen e njohurive praktike për kryerjen e detyrave, përfshirë edhe përdorimin dhe gjuajtjen taktike me armë të zjarrit.

3. Kandidatët të cilët kanë përfunduar trajnimin rifreskues nga paragrafi 2 i këtij neni i nënshtrohen provimit ricertifikues një herë në vit për gjuajtje me armë të zjarrit, siç përcaktohet në nenin 33, paragrafin 7 të këtij ligji.

4. Shpenzimet e trajnimit rifreskues dhe ricertifikues i bart poseduesi i lejes.

5. Ministri me akt nënligjor përcakton rregullat për zbatim të këtij neni.

Neni 35

Leja për institucion trajnues në fushën private të sigurisë

1. Për tu pajisur me leje për ofrimin e trajnimeve në fushën private të sigurisë, aplikuesi duhet të plotësojë këto kushte:

1.1. të jetë i regjistruar si person juridik në regjistrin e bizneseve në Republikën e Kosovës;

1.2. të ketë kaluar verifikimin e së kaluarës për subjektin që aplikon, pronarët dhe përfaqësuesin e autorizuar të tij, sipas nenit 11, të këtij ligji;

1.3. të ketë dëshmi për pronësinë ose për marrje me qira të objektit, të vlefshme së paku për kohën e kërkuar për licencë;

1.4. të sigurojë hapësira të nevojshme për mbështetje administrative dhe logjistike;

1.5. të sigurojë hapësirë prej së paku dyzet (40) m², të pajisura me pajisje të nevojshme për mbajtjen e ligjëratave;

1.6. të sigurojë një sallë për trajnime praktike dhe taktike prej së paku dyzet (40) m²;

1.7. të sigurojë pajisjet për mbrojtje nga zjarri;

1.8. të ketë të vendosura kamerat e vëzhgimit elektronik në hyrje të objektit dhe në hapësirat e mbuluara sipas nënparagrafit 1.5. dhe 1.6. të këtij neni;

1.9. pajisja për ruajtjen e incizimeve, duhet ta ruajë së paku dy (2) muaj incizimin e vëzhgimit të kamerave nga data e regjistrimit.

2. Personeli i detyrueshëm nuk duhet të jetë i dënuar për vepër penale dhe përfshin:

2.1. një menaxher në pikën e pranimit që është përgjegjës për mbajtjen dhe evidentimin e dokumentacioneve të kandidatëve për trajnim dhe caktimin e orarit të trajnimit për kandidatë;

2.2. një ligjërues për çështje ligjore me diplomë të fakultetit juridik;

2.3. një instruktor të certifikuar nga institucioni përkatës për dhënien e ndihmës së parë të pajisur me së paku një CPR model dhe një pajisje për të simuluar plagët (seti i gjurmëve) për trajnimin në fushën e ndihmës së parë;

2.4. instruktor të certifikuar nga institucioni përkatës për parandalimin e zjarrit;

2.5. minimumi nga një (1) instruktor të certifikuar dhe të autorizuar nga organi kompetent për trajnim në çdo fushë të trajnimit të specializuar të parashikuar në këtë ligj;

2.6. instruktor për trajnim praktik për përdorimin e prangave, shkopit dhe taktikat mbrojtëse.

3. Plan-programi aprovohet nga organi kompetent për trajnim themelor profesional dhe të specializuar për çdo fushë të caktuar.

4. Poseduesi i lejes, në rast të ndryshimit të adresës ose të personelit të institucionit trajnues, duhet ta njoftojë organin kompetent brenda pesëmbëdhjetë (15) ditësh dhe të plotësojë kushtet e parapara me këtë ligj.

5. Poseduesi i lejes si institucion trajnues në fushën private të sigurisë ka të drejtë për hapjen e degëve të tjera në komunat e Republikës së Kosovës, duke i plotësuar kushtet e këtij neni.

6. Ministri me akt nënligjor, përcakton rregullat për zbatimin e këtij neni.

Neni 36

Certifikimi i instruktorëve në fushën private të sigurisë

1. Personi fizik për tu pajisur me certifikatë për instruktor në fushën private të sigurisë, duhet t'i plotësojë këto kushte:

1.1. të ketë moshën mbi njëzet e një (21) vjet;

1.2. të ketë së paku tre (3) vite përvojë pune në fushën e sigurisë;

1.3. të ketë kaluar provimin teorik dhe praktik për instruktor në fushën përkatëse nga organi kompetent;

1.4. të ketë të kaluar verifikimin e së kaluarës penale.

2. Ministri me akt nënligjor përcakton mënyrën e aplikimit, procedurat për mbajtje të provimit, certifikimin, plan-programin dhe njohjen e certifikatave, si dhe procedurat për lëshimin e kartelës zyrtare të identifikimit për instruktorë.

KAPITULLI V INSPEKTIMI

Neni 37 Inspektimet

1. Organi kompetent, përmes inspektimeve të rregullta, të përsëritura dhe të jashtëzakonshme mbikëqyr zbatimin e këtij ligji nga të gjithë ata që ushtrojnë veprimtarinë private të sigurimit.
2. Inspektimet kryhen nga inspektorët për shërbimet private të sigurisë, të caktuar dhe të autorizuar nga organi kompetent.
3. Inspektorët kanë të drejtë të inspektojnë Qendrën e certifikuar të Kontrollit, për të siguruar se i plotëson kushtet e përcaktuara me këtë ligj.
4. Inspektorët kanë të drejtë të hyjnë në hapësira të punës të poseduesit të lejes dhe aty ku ushtrohet veprimtaria private e sigurimit njëzet e katër (24) orë në ditë, shtatë (7) ditë në javë, pa paralajmërim paraprak, vetëm për qëllime të inspektimit.
5. Kur gjatë inspektimeve mund të ketë rezistencë që rrezikon inspektorët, organi kompetent mund të kërkojë asistencën e policisë.
6. Kompania private e sigurimit, punëtorët e sigurimit dhe ata të cilët ushtrojnë veprimtarinë private të sigurimit, duhet të bashkëpunojnë dhe të japin informata dhe të dhëna të sakta organit kompetent, për zbatim të këtij ligji.
7. Inspektorët nuk mund të komunikojnë me kompanitë private të sigurimit jashtë detyrave të tyre zyrtare.
8. Policia e Kosovës duhet t'i dërgojë një kopje të raportit të incidentit organit kompetent në rastet kur në incident janë të përfshirë poseduesit e lejeve, subjektet që ushtrojnë veprimtarinë private të sigurimit apo punëtorët e sigurimit.
9. Organi kompetent pezullon çdo aktivitet aty ku ushtrohet veprimtaria private e sigurimit në kundërshtim me këtë ligj, deri në plotësimin e kushteve të përcaktuara në këtë ligj.
10. Ministria me akt nënligjor përcakton mënyrën dhe procedurat e inspektimit, në përputhje me ligjin përkatës për inspekte.

KAPITULLI VI TË DHËNAT

Neni 38 Mbledhja dhe përpunimi i të dhënave nga organi kompetent

1. Organi kompetent mbledh dhe përpunon të dhënat si në vijim:
 - 1.1. të dhënat e aplikuesve, atyre që posedojnë leje për ofrimin e shërbimeve private të sigurisë, institucioneve për trajnime themelore profesionale dhe të specializuara;
 - 1.2. të dhënat për punëtorët e sigurimit;
 - 1.3. të dhënat për qentë e sigurimit;
 - 1.4. të dhënat e automjeteve për transportin e parave të gatshme dhe sendeve të tjera me vlerë;

- 1.5. të dhënat për emblemat dhe uniformat e punës;
- 1.6. të dhënat për pajisjet e sigurimit;
- 1.7. të dhënat për kontratën me klientin;
- 1.8. të dhënat për të gjitha armët e zjarrit të autorizuar;
- 1.9. të dhënat mbi inspektimet e kryera;
- 1.10. të dhënat e objekteve dhe specifikat e rëndësishme të sigurisë;
- 1.11. të dhënat për raportet e incidenteve dhe veprave penale;
- 1.12. të dhënat për kandidatët për provimin shtetëror për punëtorë të sigurimit themelor dhe të specializuar;
- 1.13. të dhënat për verifikimin e së kaluarës për subjektin aplikues, pronarët, themeluesit dhe personat përgjegjës.

2. Mbledhja dhe përpunimi i të dhënave sipas këtij neni, bëhet në pajtim me ligjin përkatës për mbrojtjen e të dhënave personale.

Neni 39

Mbledhja dhe përpunimi i të dhënave nga poseduesi i lejes

1. Poseduesi i lejes për shërbimet private të sigurisë mban në formën e shkruar dhe/ose elektronike, të dhënat si në vijim:

- 1.1. kontratat e nënshkruara me të gjithë personat e punësuar;
- 1.2. të dhënat për kartelat e identifikimit për të gjithë punëtorët e sigurimit;
- 1.3. të dhënat për qentë e sigurimit;
- 1.4. të dhënat e automjeteve për transportin e parave të gatshme dhe sendeve të tjera të vlefshme;
- 1.5. të dhënat për përdorimin e forcës;
- 1.6. pajisjet e sigurimit;
- 1.7. të dhënat për të gjitha armët e zjarrit të autorizuar;
- 1.8. të dhënat për incidentet dhe veprat penale;
- 1.9. të dhënat për ndryshimet e themeluesit, pronarit dhe përfaqësuesit të autorizuar në certifikatë të biznesit;
- 1.10. të dhënat për kontratat me klientët;
- 1.11. të dhënat për planet e sigurisë.

2. Poseduesit e lejes mbledhjen dhe përpunimin e të dhënave sipas këtij neni e bëjnë në pajtim me ligjin përkatës për mbrojtjen e të dhënave personale.

3. Të dhënat dhe komunikimet telefonike ruhen si në vijim:

3.1. tre (3) muaj, nga momenti i regjistrimit, i të gjitha komunikimeve telefonike në dhe nga Qendra e Kontrollit;

3.2. nga momenti i regjistrimit të dhënat dhe komunikimet telefonike të lidhura me incidentet dhe veprat penale ruhen tetëmbëdhjetë (18) muaj në Qendrën e Kontrollit.

Neni 40

Raportimi i poseduesit të lejes për shërbimet private të sigurisë

1. Poseduesi i lejes i raporton me shkrim organit kompetent për çfarëdo ndryshimi në të dhënat e përcaktuara në nenin 39 të këtij ligji, brenda pesëmbëdhjetë (15) ditësh.

2. Në rast të ndërrimit të adresës së zyrës për operim, poseduesi i lejes duhet të raportojë brenda njëzet e katër (24) orëve në organin kompetent.

KAPITULLI VII

PEZULLIMI DHE REVOKIMI I LEJEVE

Neni 41

Pezullimi i lejes

1. Organi kompetent pezullon lejen për periudhën deri në një (1) vit, nëse:

1.1. informata e ofruar në lidhje me kërkesën për leje vërtetohet se është e pavërtetë;

1.2. poseduesi i lejes nuk i plotëson më kushtet për marrje të lejes;

1.3. organi kompetent ka gjetur se poseduesi i lejes është gjobitur për të njëjtën shkelje të ligjit më shumë se dy herë brenda vitit kalendarik;

1.4. bën aftësim të kandidatëve në kundërshtim me plan-programin e aprovuar nga organi kompetent;

1.5. mban trajnime në lokacione apo objekte të ndryshme nga ato që ka lejuar organi kompetent.

2. Poseduesi i lejes është i obliguar që brenda tridhjetë (30) ditësh të njoftojë klientët për pezullimin e lejes.

3. Poseduesi i lejes ka të drejtë të parashtrojë ankesë në Komisionin e Ankesave kundër vendimit për pezullim të lejes, në pajtim me nenin 9 të këtij ligji.

4. Poseduesi i lejes, në rast të vendimit refuzues nga Komisioni i Ankesave, dorëzon lejen tek organi kompetent.

5. Ministri me akt nënligjor rregullon procedurën e pezullimit të lejes.

Neni 42

Revokimi i lejes

1. Organi kompetent revokon lejen në këto raste:

1.1. nëse poseduesi i lejes me shkrim deklaron se nuk dëshiron të ushtrojë më veprimtarinë e shërbimeve private të sigurisë;

1.2. nëse poseduesit të lejes i është ndaluar ushtrimi i veprimtarisë së sigurisë private me vendim gjyqësor të formës së prerë;

1.3. nëse poseduesi i lejes ushtron veprimtarinë e sigurisë private gjatë kohës së pezullimit të lejes;

1.4. bën aftësimin e kandidatëve nga pjesa teorike ose praktike gjatë kohës së pezullimit të lejes.

2. Leja e cila është revokuar nga organi kompetent nuk mund të përtërihet ose të kthehet.

3. Nëse leja është revokuar nga organi kompetent, ndalohet aplikimi brenda tri (3) viteve, duke filluar nga dita e heqjes.

4. Pronari dhe përfaqësuesi i autorizuar i kompanisë që i është revokuar leja, e kanë të ndaluar të aplikojnë për të marrë leje për shërbimet private të sigurisë për tre (3) vjet prej datës së marrjes së vendimit për heqjen e lejes.

5. Poseduesi i lejes ka të drejtë të parashtrojë ankesë në Komisionin e Ankesave, kundër vendimit për revokimin e lejes, në pajtim me nenin 9 të këtij ligji.

6. Poseduesi i lejes është i obliguar që brenda tridhjetë (30) ditësh të njoftojë klientët në rast të revokimit të lejes.

7. Poseduesi i lejes dorëzon lejen tek organi kompetent në rast të vendimit refuzues nga Komisioni i Ankesave.

8. Ministri me akt nënligjor rregullon procedurën e revokimit të lejes.

Neni 43

Revokimi i kartelës së identifikimit të punëtorit të sigurimit

1. Organi kompetent mund të revokojë kartelën e identifikimit në këto raste:

1.1. nëse konstatohet se punëtori i sigurimit ka vepruar në kundërshtim me nenin 23 dhe nenin 27 të këtij ligji;

1.2. nuk plotëson më kushtet për marrje të kartelës së identifikimit;

1.3. organi kompetent ka gjetur se punëtori i sigurimit ka vepruar në kundërshtim me autorizimet që i janë dhënë me këtë ligj;

1.4. vërtetohet se janë të pavërteta informatat ose dokumentacioni i ofruar në lidhje me aplikimin për kartelë të identifikimit.

2. Nëse kartela e identifikimit është revokuar nga organi kompetent sipas paragrafit 1, nën-paragrafët 1.1, 1.3 dhe 1.4 të këtij neni, ndalohet aplikimi për periudhën prej tre (3) muaj deri në tre (3) vite.

3. Punëtori i sigurimit duhet t'a dorëzojë kartelën e identifikimit menjëherë nga marrja e vendimit për heqjen e kartelës zyrtare të identifikimit.

4. Punëtori i sigurimit, kundër vendimit për revokimin e kartelës zyrtare të identifikimit, ka të drejtë të parashtrojë ankesë në Komisionin e Ankesave në pajtim me nenin 9 të këtij ligji.

5. Ministri me akt nënligjor rregullon procedurën e revokimit të kartelës zyrtare të identifikimit.

KAPITULLI VIII DISPOZITAT NDËSHKUESE

Neni 44 Sanksionet kundërvajtëse

1. Për shkelje të dispozitave të këtij ligji, organi kompetent nxjerr vendim për shqiptimin e gjobës për poseduesin e lejes, pronarin, përfaqësuesin e autorizuar dhe punëtorët e sigurimit dhe ndaj atyre që ushtrojnë veprimtarin private të sigurimit në kundërshtim me këtë ligj.

2. Kundër vendimit, sipas paragrafit 1 të këtij neni, mund të ushtrohet ankesë në Komisionin për Ankesa në afat prej tridhjetë (30) ditësh nga dita e marrjes së vendimit.

3. Në rast se nuk ekzekutohet pagesa, organi kompetent angazhon përmbaruesin privat sipas Ligjit përkatës për procedurën përmbarimore për ekzekutimin e vendimit.

4. Poseduesi i lejes dënohet me gjobë prej dymijë (2,000) deri dhjetëmijë (10,000) Euro nëse:

- 4.1. nuk zbaton nenin 4, paragrafët 1, 2 dhe 4 të këtij ligji;
- 4.2. nuk zbaton nenin 10, paragrafët 2 dhe 6 të këtij ligji;
- 4.3. nuk zbaton nenin 14, paragrafin 1 të këtij ligji;
- 4.4. nuk zbaton nenin 28, paragrafët 1, 2, 3, 4 dhe 5 të këtij ligji;
- 4.5. nuk zbaton nenin 37, paragrafin 9 të këtij ligji;
- 4.6. nuk zbaton nenin 41, paragrafin 2 dhe paragrafin 4 të këtij ligji;
- 4.7. nuk zbaton nenin 42, paragrafët 6 dhe 7 të këtij ligji.

5. Poseduesi i lejes dënohet me gjobë prej pesëqind (500) deri në katërmijë (4000) Euro nëse:

- 5.1. nuk zbaton nenin 4, paragrafin 3 të këtij ligji;
- 5.2. nuk zbaton nenin 10, paragrafët 2 dhe 5 të këtij ligji;
- 5.3. nuk zbaton nenin 14, paragrafin 2 ose nenin 25, paragrafi 2 të këtij ligji;
- 5.4. nuk zbaton nenin 18, paragrafët 3, 4 apo 5 të këtij ligji;
- 5.5. nuk zbaton nenin 19, paragrafin 1 të këtij ligji;
- 5.6. nuk zbaton nenin 20, paragrafët 1, 2, 4, 6, dhe 7 të këtij ligji;
- 5.7. nuk zbaton nenin 21, paragrafët 1, 2 dhe 4 të këtij ligji;
- 5.8. nuk zbaton nenin 22, paragrafët 1 dhe 2 të këtij ligji;
- 5.9. nuk zbaton nenin 24 të këtij ligji;
- 5.10. nuk zbaton nenin 14, paragrafin 7, ose nenin 25 paragrafët 4, 5, 6, 7, 8, 9, 10, 11, 12, 13, 14 dhe 15 të këtij ligji;

- 5.11. nuk zbaton nenin 26, paragrafin 13 të këtij ligji;
- 5.12. nuk zbaton nenin 27, paragrafin 4 të këtij ligji;
- 5.13. nuk zbaton nenin 29, paragrafët 1 dhe 2 të këtij ligji;
- 5.14. nuk zbaton nenin 30, paragrafët 1, 2, 3, 5, 6, 7, 8 dhe 9 të këtij ligji;
- 5.15. nuk zbaton nenin 27, paragrafin 6 të këtij ligji;
- 5.16. nuk zbaton nenin 14, paragrafët 3 dhe 7 të këtij ligji;
- 5.17. nuk zbaton nenin 31, paragrafët 1 dhe 3 të këtij ligji;
- 5.18. nuk zbaton nenin 33, paragrafët 1, 5 dhe 7 të këtij ligji;
- 5.19. nuk zbaton nenin 34, paragrafët 1 dhe 4 të këtij ligji;
- 5.20. nuk zbaton nenin 35, paragrafin 1 nënparagrafët, 1.8., 1.9., paragrafët 2 dhe 4 të këtij ligji;
- 5.21. nuk zbaton nenin 37, paragrafët 4 dhe 6 të këtij ligji;
- 5.22. nuk zbaton nenin 39, paragrafin 1, nënparagrafin 1.3. të këtij ligji;
- 5.23. nuk zbaton nenin 40, paragrafët 1 dhe 2 të këtij ligji.

6. Përfaqësuesi i autorizuar ose punëtori i sigurimit dënohet me gjobë prej njëqind (100) deri në dymijë (2,000) Euro nëse:

- 6.1. nuk zbaton nenin 4, paragrafin 3 të këtij ligji;
- 6.2. nuk zbaton nenin 20, paragrafin 2 të këtij ligji;
- 6.3. nuk zbaton nenin 27, paragrafët 1, 2, 4, 7 dhe 8 të këtij ligji;
- 6.4. nuk zbaton nenin 28, paragrafët 3, 6 dhe 7 të këtij ligji;
- 6.5. nuk zbaton nenin 30, paragrafin 3 të këtij ligji.

7. Përfaqësuesi i autorizuar ose punëtori i sigurimit dënohet me gjobë prej pesëdhjetë (50) deri në katërqind (400) Euro nëse:

- 7.1. nuk zbaton nenin 14, paragrafët 4, 5 dhe 6 të këtij ligji;
- 7.2. nuk zbaton nenin 22, paragrafin 2 të këtij ligji;
- 7.3. nuk zbaton nenin 23 të këtij ligji;
- 7.4. nuk zbaton nenin 24 të këtij ligji;
- 7.5. nuk zbaton nenin 25, paragrafët 1 dhe 2 të këtij ligji;
- 7.6. nuk zbaton nenin 26, paragrafët 1, 2, 4, 5, 6, 7, 8, 9, 10, 11 dhe 12 të këtij ligji;

- 7.7. nuk zbaton nenin 27, paragrafët 1, 4, 5 dhe 6 të këtij ligji;
- 7.8. nuk zbaton nenin 30, paragrafët 1, 5, 6, 7, 8 dhe 9 të këtij ligji;
- 7.9. nuk zbaton nenin 31, paragrafët 1 dhe 3 të këtij ligji;
- 7.10. nuk zbaton nenin 33, paragrafët 1 dhe 7 të këtij ligji;
- 7.11. nuk zbaton nenin 37, paragrafin 6 të këtij ligji;
- 7.12. nuk zbaton nenin 43, paragrafin 3 të këtij ligji.

KAPITULLI IX DISPOZITAT KALIMTARE DHE PËRFUNDIMTARE

Neni 45

Vlefshmëria e Licencave dhe Certifikatave

1. Licencat ekzistuese për kompanitë private të sigurimit dhe institucionet trajnuese, janë të vlefshme deri në skadim të afatit të tyre.
2. Certifikatat ekzistuese të instruktorëve janë të vlefshme deri në skadimin e afatit të tyre.
3. Kartelat ekzistuese të identifikimit të punëtorëve të sigurimit, janë të vlefshme deri në skadimin e afatit të tyre.

Neni 46

Zbatimi i akteve nënligjore në fuqi dhe nxjerrja e akteve tjera nënligjore

1. Për aq sa nuk janë në kundërshtim me këtë ligj, deri në miratimin e akteve nënligjore tjera për zbatimin e këtij ligji, vazhdojnë të zbatohen:
 - 1.1. Udhëzimi Administrativ Nr. 30/2011 - MPB për Masat, Autorizimet dhe Detyrat e Punëtorëve të Sigurisë;
 - 1.2. Udhëzimi Administrativ Nr. 31/2011 - MPB për Caktimin e Operatorit të Mbrojtjes së Afërt për Personin që Sigurohet;
 - 1.3. Udhëzimi Administrativ Nr. 11/2012 - MPB mbi Masat, Autorizimet dhe Detyrat e Kompanive Private të Sigurimit;
 - 1.4. Udhëzimi Administrativ Nr. 07/2012 - MPB për Themelimin e Komisionit për Shqyrtimin e Ankesave;
 - 1.5. Udhëzimi Administrativ Nr. 10/2012 - MPB për Mbledhjen dhe Mirëmbajtjen e të Dhënave nga Organi Kompetent;
 - 1.6. Udhëzimi Administrativ Nr. 06/2012 - MPB për Trajnimin, Certifikimin, Ricertifikimin dhe Licencimin e Institucioneve Trajnuese;
 - 1.7. Udhëzimi Administrativ Nr. 09/2012 - MPB për Blerjen, Ruajtjen dhe Përdorimin e Pajisjeve;
 - 1.8. Udhëzimi Administrativ Nr. 08/2012 - MPB për Procedurat e Inspektimit;

1.9. Udhëzimi Administrativ Nr. 27/2011 - MPB për Procedurat e Licencimit;

1.10. Udhëzimi Administrativ Nr. 29/2011 - MPB për Qendrën e Kontrollit.

2. Për zbatimin e këtij ligji, në afat prej një (1) viti, nga hyrja në fuqi e këtij ligji, duhet të nxirren aktet nënligjore të parapara me këtë ligj.

Neni 47 **Taksat administrative**

1. Ministri me vendim cakton tarifën e pagesës për lëshim të dokumenteve që burojnë nga ky ligj.

2. Pagesa nga paragrafi 1 i këtij neni, përcaktohet në masën dhe vetëm për ato shërbime të cilat kanë kosto shtesë dhe nuk mund të jetë më e madhe se kostoja mesatare për ato shërbime.

Neni 48 **Shfuqizimi**

Me hyrjen në fuqi të këtij ligji shfuqizohet Ligji Nr. 04/L-004 për Shërbimet Private të Sigurisë.

Neni 49 **Hyrja në fuqi**

Ky ligj hyn në fuqi pesëmbëdhjetë (15) ditë pas publikimit të tij në Gazetën Zyrtare të Republikës së Kosovës.

Ligji Nr. 08/L-274
11 korrik 2024

Shpallur me dekretin Nr. DL-105/2024, datë 30.07.2024 nga Presidentja e Republikës së Kosovës Vjosa Osmani-Sadriu